



## Teruel 1974-1977

Ánchel Conte Cazcarro

Á toz os camaradas, espezialmén á María Cebrián, Eugenio Pérez, Charo Pardos e Ana Lasheras, pioners ya muertos.

En zaguerías de chulio de 1974 rematoron as oposizions, las quité con un numero que me permitiba triar plazas lamineras á Madrid, Barzelona, Sevilla e atras ziudaz grans. No tenié ni un menuto de duda: truqué á Vicente Cazcarra pa dizir-le qué caleba que fese. Disziplina de Partiu; yeran tiempos an que a militanzia te marcaba la vida. Cazcarra dizió: «¿Qué plazas hay en Aragón?». E á yo me se borró lo mapa d'España. «¿En Aragón?: Teruel». Sabebe lo que me diría: «Eres libre de hacer lo que quieras, pero en Teruel el Partido no está organizado». Sentié miedo, porque ir ta Teruel yera asumir una responsabilidat politica que me superaba, siempre ebe estau militán de base e de botiboleo me sentibe n'a obligazió d'organizar o Partiu, sinse guaire esperenzia. Pero no dudé: «Teruel, Instituto Masculino Ibáñez Martín», dizié á la ora de fer a tría de plazas. E á l'alegría s'achuntoron temors deván as obligazions que me cayeban.

Eloy Fernández en agosto m'acompañó pa presentar-me chen e compañers. Tamién dezidié de vivir n'o Colegio Menor San Pablo con intenzió de mirar un piso, encara que me i quedé un año tan á gusto. O piso arribaría o curso seguién. De camín descubrié una ziudat e un mundo an que vivir yera fázil e amable. O cosmos minusclo de Teruel e o instituto me feban tener esperanza. Toz nos conoi-xébanos e no fue guaire difízil saber ascape á qué compañers podebe fer-les arribar *Mundo Obrero*. En seis meses tenébanos una zelula integrada per profesors d'os dos institutos e bel profesor d'o Colegio Universitario. Pero no yera ixo, caleba salir de l'ambito academico e trobar viellos comunistas. E asinas fue; en primeras n'o Rabal, e dimpués á Gea, El Cuervo, Sarrión, Rubielos, San Agustín... Quité o carné de conducir e compré un auto pa poder desplazar-me ta Zaragoza e ta toz os cantons d'a provinzia. Á bonico iba creixendo, més fazilmén que no pensabe: muita chen yera esperando a oportunidat de trobar-ser con o PCE dimpués de decadas de silencio. Arribemos t'Alcañiz, Valderrobres, ta la zona minera. E ya no yeran só que viellos militans, también chen choven, mui choven á la zona minera, á Alcañiz, á Teruel; alumnos de Machisterio e d'os institutos s'i incorpororon e podiemos creyar as Juventudes Comunistas. En un año ya esistiba o PCE turolense, chicot, pero sinse que a clandestinidat nos empachase dar a cara. En silencio, pero sin reblar. O PCE turolense yera una realidat cuan o Dictador morió, de manera que empezi-piemos a Transizió con una organizazió capable, estando encara clandestinos, de repartir *Mundo Obrero* n'os mercaus, de pinchar una inmensa pancarta n'o Viaducto, de dirichir una campaña activa pro amnistía, d'ubrir puertas e finestras ta la libertat. Mesmo organizemos CCOO en Teruel ziudat.

Visto agora tot pareix fácil, encá que a memoria ye selectiva e os momentos de depresión, de miedo, de cansera, d'os milars de quilometros, d'a polizía n'a puerta de casa mía cuan tenébanos una reunión, d'o correu controlau, d'o periglo de levar o maletero de l'auto empliu de *Mundo Obrero* e propaganda d'o Partiu, tot queda compensau, prou que sí, con o goyo d'aber estau capaces de fer una campaña electoral en 1977 plena d'ilusión, treballando como fornigas per tota la provincia, con mítins en cuantos lugars que ye imposible de fer-ne memoria: plaza de toros d'Alcañiz, Escucha, n'o Matarraña, Rubielos, Sarrión, dos en Teruel, espezialmén notable o d'o Teatro Marín, de bor en bor e sonando una Internacional en chino (amprada d'o camarada Carlos Luis de la Vega), porque ni sisquiera tenébanos una versión en español. E aquel cuasi 60 % de votos á El Cuervo... Cuan i pienso encara siento emozione e m'alcuerdo de compañers e camaradas d'aquella formidable aventura; de toz, encara que muitos nombres me s'han borrau, pero no pas a suya faz, ni as ilusions, ni o suyo cheneroso treball.




ILUSTRACIÓN  
Andrea Plube